

Vizyon

Lanmen Michel i sal

Depi enpe letan i kler ki Mr. James Alix Michel, osi koni koman Jj in mont lo en pedestal e i kwar i kapab dir lepep Seselwa nenport kwa e ki lepep pou kwar li. In fini kwar ki lepep Seselwa se bann enbesil e ki se li zonn pli malen. I pas son letan anbet lepep Seselwa avek tou kalite koze. Nou anvi dir avek Mr. Michel 'Enough is Enough!' Lepep Seselwa in fini dekouver ou bann mansonz ek ou bann bat latet. Ki mannyer en boug ki ti komans son karyer politik le 5 Zen 1977 avek en fizi, zour en Koudeta kan Konstitisyon ti ganny vyole e plizyer Seselwa ti ganny touye, i kapab vin dir nou son lanmen i prop? Eski i pa war disan Jeannie, Chang-Him ek Rachel pe koule ant son ledwa?

Krim, vyolans ek disparisyon

Depi le 5 Zen, en kantite Seselwa in ganny touye, lezot in disparet e bokou lezot in ganny viktimize dan en kantite fason ziska zot ti bezwen kit pei e al viv a-letranze. Vi ki Mr. Michel ti la dan sa gouvrenman, e pli enportan, dan larme, eski i pe dir nou ki li son lanmen ti reste prop? Dan sa ka, eski Mr. Michel i kapab dir nou lekel ki zot lanmen i sal? Si i pa kapab fer sa, alor i kler ki i en konplis, e ki alor son lanmen i sal avek disan lepep Seselwa. Eski Mr. Michel i kapab dir nou kwa ki i konnen dan lanmor Simon Desnousse, Mike Asher, Alton Ah-Time, Gerard Hoarau, Hoffman, ek tou sa bann lezot Seselwa? Eski vreman son lanmen i prop?

Oli laverite ek senserite?

Mr. Michel i dir avek lepep Seselwa ki son lanmen i prop e ki li i en boug ki senser e ki koz laverite. Alor nou pe atann ki i vin devan e profite pandan son bann rankont konsiltativ pou rakont nou sa ki i konnen dan tou sa bann zafer. Lepep Seselwa tya byen kontan konnen ki'n arive avek sa bann Seselwa e kote zot lekor i ete. Sirman koman en zonn ki prezant li koman en bon boug, eparlao tou, en bon kretyen, i ava konsider sa koman son devwar pou enform bann paran afen ki zot lespri i ava konn tranquilite ek lape. Si Mr. Michel pa fer sa, nou pou senpleman dir ki i en bater latet e en boug malonnet. An dot mo, en gran ipokrit ki la koman en loulou anba lapo mouton.

Lanmen Michel i sal!

Prezidan Politik Bonmarse

Lannan zis en fason pou dekri Mr. Michel: 'Prezidan Politik Bonmarse'. Sak fwa ki sa boug i koz lo politik bonmarse, i donn lepep Seselwa en doz sa menm pwazon. Me selman, apre i sot laba e i dir ou ki lopoziyon ki fer sa. I kler ki in fini perdi son pider, e ozordi i pe senpleman fer tou sa ki i kapab zis pou reste o-pouvwar. Sa fodre sanze.

Ekout byen ki mannyer sa boug i fer politik bonmarse. I anvoy son minis vin dan Lasanble pou anonse ki avek sistenm ekonomik, gouvrenman pou koup 'carers'. Zot etabli en sistenm pou teste mwayen bann dimoun, e malgre bann ners i dir ki sa sistenm pabon, Mr. Michel pa ekoute.

James Michel ti ansanm avek Albert René depi 1977. Nou dan SNP, nou napa okenn ezitasyon pou dir ki lanmen Michel ansanm avek lanmen Albert René i non selman sal, me ki i annan disan lepep Seselwa lo la. Se pandan ki zot in o-pouvwar ki tou sa bann krim in arive. Se zot ki responsab. Zanmen zot in vreman fer zefor pou met tou keksoz o-klér e menm pou pourswiv serten ki'n partisip dan sa bann krim. James Michel i devret aret bat latet Seselwa e senpleman aksepte ki son lanmen pa prop. Lepep i konn sa tre byen. Aret fer ou lekor enbesil, me respekte sa pep.

Letan rezilta i sorti e anba sa sistenm bokou dimoun i perdi carer, Mr. Michel i mont Takamaka e i dir ki ners pa konn fer zot louvraz, e ki zot travay dan lespri politik. Me selman sa menm Mr. Michel i osi dir ki i pa konnen si tou sa ki i pe dir i laverite! Ki kalite sa? Eski pa sanmen politik bonmarse e fer lapenn sorti kot en swadizan prezidan?

Seselwa, annou kontinyen ouver nou lizye ek nou zorey byen gran. I annan tro bokou politik bonmarse ozordi dan nou pei. Lepep pe soufer avek sa pri lavi, e sel keksoz ki nou pe demande se silvouple soulaz malere. Aret anbet nou Mr. Michel, koz laverite. Seselwa in fini war ou dan gran kler.

Fodre rann kont sa 2.5 Bilyon Dolar!

Napa Seselwa?

Mr. Michel fek anonse ki in swazir en boug sorti Uganda koman Sef Ziz. Kestyon ki tou dimoun pe kontinyen demande se: Eski napa Seselwa ki kapab pran sa plas? Kan eski nou pou met konfyans dan nou Seselwa, olye dan etranze?

Eski bann Seselwa kalifye pe vreman ganny tou loportinite pou devlope e montre zot abilite pou pran sa bann responsabilite? I kler ki ziska prezan sa pa vreman leka. Kan Seselwa i fer laplikasyon pou pozisyon Ziz, gouvemman i refize.

Dan SNP nou kwar ki in ler pou donn Seselwa sa vre sans dan son prop pei. In ler pour Seselwa kapab pran sa bann responsabilite e etabli lazistis parmi nou pep. Nou fatigue avek bann etranze ki pran lord avek lotorite pli o zis pou ganny faver. Problem se ki apre, sa bann etranze i vin Seselwa e bar plas pour Seselwa avanse. Donn Seselwa sa vre sans dan son prop pei.

Faver i fer zot lise!

Bokou dimoun pe obzerve ki mannyer serten bann dimoun ki lis plis dan bann miting konsiltativ, se bann ki'n ganny gran faver ki al ziska bann lenzistis. Se zot ki konn pli byen ki mannyer pou aranz pei, e pa oubliye ki se zot osi ki servi sa mo 'Mr. Prezidan' dan sak fraz.

Serten in ganny faver kot gouvemman in pey pour zot lakaz lwe, lezot in konble lanmar pou fer flat, lezot in ganny larzan pou fer biznes, serten lezot in vol dimoun e ganny proteze. Lepep pe not tou sala byen. Me sa ki fer lapenn se sa bann ki dir tou i byen me apre bezwen pret larzan pou aste manze e pey bil!

PAS PARTOU

Lisyen mord son met!

Ziska son lisyen pa oule li! Wi, sa en zistwar enkrwayab, me vre. Lisyen Madanm Potter in mord li dan son prop lakour! Sa lisyen i fatigue avek sa bann politik bon marse e fer lapenn, e in sot lo madanm e desir en kopo! Nou partaz son souffrans, me sel konsey ki nou kapab donn li, se pou sanz son larogans e son fason ensilte dimoun. Pran sa aksyon ou lisyen koman en mesaz profetik e byen serye!

'Mat fes' Marc Volcy

Pour kanpanny eleksyon, SPPF ti fer Marc Volcy sante ki mannyer tou kek-

En lot bat latet SPPF

Laverite i pli for ki mansonz. Apre tou sa bann lannen bat latet, tou lezour en lot laverite i mont lo sifas. Annou regard enn.

Pandan en kantite letan, SPPF ti dir ki Sesel pa ti pe ganny okenn led avek bann pei devlope akoz nou ti tro devlope. Zot ti al pli lwen pou dir ki nou pe ganny pini akoz nou progres. Sa ti en gro mansonz. Sesel pa ti pe ganny ede akoz bann pei devlope pa ti dakor avek son politik.

Ki mannyer nou dekouver sa? Lanbasader Linyon Eropeen in fer kler ki akoz Sesel in fer

en 'about turn' 100% dan son kalite politik, e ki IMF pe vey tou depans pei, Linyon Eropeen i pare pou donn pei en lasistans 5.9 milyon Ero.

Wi, ser ek frer Seselwa, in ler pour nou tou konpran sa tre byen. Si depi lontan Sesel ti'n sanz son prensip ki'n anmenn nou dan sa gran trou ekonomik, nou pei ti pou ganny bokou led partou kote pour bann diferan program. Ozordi nou pa ti pou dan sa salte, me nou pep ti ava pe viv byen. Nou pa ti pou dan sa gran souffrans pe rode kwa ki nou pou met lo labat nou fanmiy. SPPF ki'n met nou la.

Seselwa pe vin pli pov

Malgre tou sa bann gran koze lo lekonomi e ki mannyer roupi pe stabilize kont dolar, i annan en sel laverite ki tou Seselwa pe viv: Lafanmiy Seselwa pe vin pli pov toulezour. Dimoun i trouv li pli difisil pou ganny larzan pou debourye. Tou keksoz in vin ser. Elektrisite ek delo in double, marsandiz dan laboutik i pli ser, Day Care osi in ogmante. Partou kot dimoun i vire zafer i sal menm, me selman lapey i reste parey.

Dapre Madanm Gamatis, dan son letan lontan, ti annan marsandiz dan laboutik, me selman dimoun ti sitan pov ki zot pa ti kapab aste sa bann prodwi. Eski Madanm Gamatis i realize ki ozordi zafer in retourn parey? Bokou dimoun i pas dan laboutik, zis zot atrap en komisyon apre zot kit li lanmenm letan zot demann pri.

En lot zafer ancor ki sa madanm ti dir se lefe ki lontan ti annan dolar dan labank, me dimoun ti napa larzan pou aste. Ozordi osi

zafer i menm parey. Se pour sa rezon ki malgre bann la pe koz lo stabilite roupi vizavi dolar, dimoun pa tro enterese akoz apre tou zot napa roupi pou aste dolar, oubyen menm pou aste en tiket pou al pronnmen.

SPPF ti koz labous plen ki Seselwa i en pep ki vwayaz plis o-monn. Zot ti rakonte ki mannyer sak vakans avyon ti plen pou al Moris. Ozordi tou sa la in sanze. Tiket in double, e avyon i monte-desann vid. Wi, Seselwa nepli annan larzan e Seselwa in vin pli pov. Pourtan Jj ti dir nou i pe vin met plis larzan ancor dan nou pos!

Seselwa, nou tou nou'n ganny anbet avek sa propagann eleksyon Jj. Ozordi i kit nou ater, tandi ki li tou keksoz i kontinyen vin dan dalo. Zis gete pour zot menm letan i vin miting dan ou distrik. Konte konbyen loto ki akonpanny li, e konbyen bodigard ki annan. Konbyen eski tou sa i arive? Jj in kit lepep ater e li i pe viv dan lopilans.

Tou lezot i laverite?

Tou le semenn zournal Regar i ekri en kanti lartik lo tou kalite keksoz ki pe arive Sesel. Regar i ekri lo koripsyon, lo labi, lo mansonz, lo bann deal sekre, e lo bokou lezot keksoz. Zannen State House i sot anler. Me semenn pase, lo en pti lartik, zot in kriy lasasen. Eski sa i en lendikasyon ki dapre State House tou lezot keksoz ki Regar i ekri lo la i vre?

Me selman nou kontinyen demande akoz ki State House pa pare pou vin koz laverite avek sa pep. Zot servi SBC ki mannyer zot oule, e zot ganny tou letan ki zot bezwen. Silvouple vin eksplik lepep Seselwa akoz \$1 milyon dolar i manke, kote larzan lotel Farquar i ale, e kot sa \$4.5 milyon dolar Perseverans in disparet.

soz Sesel i ok e byen. Lavi i an-roz i ti sante. Me la ki zafer i sal, sa menm SPPF i anvoy Marc Volcy maltret dimoun e dir zot 'mat fes'. Be pa zot menm ki ti dir Seselwa file? Bann ipokrit!

Pov Onezime

Depi ki in retournen sorti Lostrali, boug-la ti kwar i dan bon. Mr. Michel ti met li anba son lezel e State House ti'n vin son dezyenm lakaz. Malerezman pour boug-la, kan Mr. Michel ti bezwen apwent en 'press officer' se son dalon blan ki'n ganny apwente! Apre tou sa lise ki in lise, en etranze in pas devan li. Sanmenm sa ki apel ganny servi mon ami!